



*Minggu, 23 Juli 2023*

**Ogen: Markus 10:13-16**



**MEDIATE MAN ANAK**



Hari Anak Nasional (HAN) iperingeti teptep tanggal 23 Juli tiap tahun. Mbelin kal arapen kerna anak-anakta si jadi generasi sinerusken kegeluhen bangsa ras negara bage pe gereja. I bas sejarahna, perhatin kerna anak enda rehna arah persadan diberu e me kongres Wanita Indonesia (Kowani) singelakoken pekan anak-anak. I je ibahan kegiaten man anak-anak kususna paksa liburen. Kedungenna, alu erbage pertimbangan itetapkan me tanggal 23 Juli jadi Hari anak nasional. Kerina keperlun ras kepentingan anak enggo leben iukuri diberu.

Tanggungjawab orangtua, la saja kebutuhen guna daging kula, umpamana; pangan, uis ras ingan tading si layak rikut ras kesehaten tapi pe psikis, e me ketenegen geluh anak. La saja jabu-jabu si rukur guna anak-anakna tapi pe pemerintah rusaha gelah anak-anak enda sejahtera. Selain gizi buruk (stunting) si jadi persoalen man anak, i bas paksa genduari enda pe melala pangan si kurang sehat, melal penyedap rasa bas pangan e tapi kandungan gizi kurang. Ulihna enterem anak-anak si kertang tapi lit si obesitas. Kesehaten jiwa mentalna pe jadi pergumulen rikutken dunia maya si mbelin kal ngaruhna i bas geluh ras pergaulenna.

Bage me i bas jaman genduari, paksa liburen anak sekolah kuga orangtua rikut gereja erbahan wadah guna pengembangan diri anak. I bas gerejata lit karya kasih remaja, pentas seni ras sidebanna guna pengembagen kegeluhen ras kinitekenna. Bagenda me siituriken i bas renungenta, i ja piga-piga kalak maba ank-anakna man Jesus, tapi iolangi ajar—ajar. Sabap megati siakap kalak dewasa ngenca perlu jumpa ras Jesus. Anak-anak labo layak. Tapi Jesus ngalo-ngalo anak-anak e alu mandang ajar-ajarna. Standart singaloken kinirajan surga e me anak-anak e. Bage me kita arus tetap mperdiateken kebutuhen ras perkembangenna.